

KOLITI Napa 2

Polu koyoto epi'ehina fayahi

1 ¹Poluita nani Yesu Kilisitohi aposolo nele'mo ho ti'ehinamofita to bo mone lalalutifu hiti moneka nohutoti'a Koliti hepatoga Hu'mamofihi bona'a to Giliki melugu mine'ahana'a hiti asaga'i mineme bite ete hi'ahana lenali fayahi ya'ma koyo nolepito ma luto nolube.

²Afotifu Hu'ma to Sipi Boti Kilisitohi aitogati lenehe'mose'na'a to fuluna'auba ya'ma lenalitoga mino moloto mineno.

Polu gelo bise'namofihi gupisalo mino moloto minoto Hu'mamofihi fokehi li'ehina

³Sipi Boti Yesu Kilisitohi ai afo'afihi Hu'mamofihi fokehi lilune. Ai fulunamofihi afotifu to lele'mo fulu hulata afotifu nohibe. ⁴Ai keke'i luse'namofihi hapa'a fato fato'i huto nohigo lele'mo bati hulata nohibe. Ya huto Hu'mau lele'mo bati hulata nohina yamofihi lali ana huto lalalutigihigi luga'a keke'i luse'namofihi enugupisa'anilo huto nohinogomo enele'mo fulu hiluta nasana ni'ibe. ⁵To Kilisitohi gupisa'alo keke'i luse'na samahi tito anamofihi nekisa'a mone lalitoga hulata nohibe. Ana suhi huto Kilisitohi lehe'mose'na'a ya'ma lalitoga napa huto li huto hulata nohibe. ⁶Lalitoga keke'i luse'na huto hulata nohina ya'ma lenalitoga fuluna huto hilibe luto to lenele'mo bati hilibe luto huto hu limilata nohibe. To fuluna'a ya'ma lalitoga huto hu limilata nohina ya'ma lenali kumu yabe luto huto hu limilata nohinagihe. To fuluna'auba lenalitoga mino moloto fi hetofa nohu lepelenogo keke'i luse'na lalitoga huto hulata nohina ana suhi huto lenalitoga huto nohinogomo fi siti bite minete lilabe luto ni'ibe. ⁷To lali lenali kumu lifita ilata nohuta ya'ma ule'ale nohigo ma luto kehelilata nohune. Lali keke'i luse'na lilata nohuta ya'ma lenali hiti keke'i luse'na kehelite nehite fulunamofihi ketipa'a lali lilata nohutana lenali ana hite lilabe.

⁸Lalalutigitabe, Esia metoga nohuto keke'i luse'namofihi lu gupisalo minomo ti'ehinamo ni'ibe. Ya'mu lenegekesu ho lalibe luto lilube

kehelilo. Mone kegi'a ya'ma keta'a hiti nasana goli'a hiti nasanauba lugupisalo tiloto lele'mo ho kalina'a nohigo molo emito minalupi fililupi luto mone mekeheli'ohutamo ni'ibe. ⁹To ya'ma fililatanamofihi ka'a nolune luto komopati kotinifa gi'ehina yanauba ya hu'ehinaya mone huto hu melimi'ehinamo ni'ibe. Lali amuya'amu kehelutogo limo ito fa'menena lolo hulenogo Hu'mau filise'naguti lele'mo ho tilata bomofihi ai amuya'amu kehelutogo minalune luto ya'ma nasana huto hu limi'ehinamo ni'ibe. ¹⁰To ai'a ya'ma filise'namu lubuto bi'ehina ya hulago yanauba minoto aku'i haka ho molo letalube'mu hibe. Ya'ma hu letoba letoba huto ya'ma ka'a keheliya ito nohuto aitoga lifita'i molo'ohune. ¹¹To lenali Hu'mamofitoga lilana yanauba bati nohigo Hu'mamofihi ai'a komopa'a lamana huto yabe luto nolun etenogo lito lubuto bilenogo bona'a asaga'magih enabagaguti lali kumu Hu'mamofihi fokehi hete enegelo bite minalabe.

Polu Koliti bonatoga bilube'mu nohuto fato suhi lolo hu'ehina hapa'a

¹²Laliti'mu kehelutogo nesi'a tilata nohina. Ya'ma ya hu'ohuto'mu komopati lusiga noluto to lama'nakagu ya'ma metoga nohutogo komopatiuba nasana mone kumu li fitu falina'a meni'ibe. Lali Hu'mamofihi ka mekeheli'ahana bona'i enali enubulo ya suhi huto minoto mono ka kehelilata nehana bona'i lenali lenubulo bati huto minolata nohune. To lali metoga bona'magi kehelilata nehanalo amuya moloto bati huto mino'ohuta meni'ibe. Hu'mau lele'mago ai amuya'alo bati huto minolata nohune. ¹³⁻¹⁴Nani kaga'ni faga faga hiti menolube. Kaga hapa lapa'a mone fala menokube. Fayahi koyoto lepilenogo'ni leka sete keheliya ilabe luto koyolata nohube, luto akeheli'ohube. To luga'a lenali mele'isi nani hapa'ni akeheli fe li'ahana suhi hite lenali aliha'a keheli fe lite su halabe luto nokehelube. Ya hilenogo lenali kumu nani kehelugo tilata nohina ya suhi hite lenali Sipi Bo Yesuhi ya'ma kana napa'alo nani kumu kehelinogo tilibe.

¹⁵Kaga ya luto noluna ya'ma keheliya i'ohuto lili'na kana loe yupahi lenalitoga biluna nasanauba komopatinigu bati hilibe luto le'mo babahi hu'ohuna. ¹⁶Buto bu lenogoloto Masetonia metoga buto minoloto aku'i i behe huto oto lenalitoga nehetinogo nele'mo kohe tete kapogu molo netenogo Yutia metoga bilufihe luto keheli'ohuna yabe. ¹⁷To nani ma luto lugo keta mehuse huto fato'mofihi hu'ehinamo yabe lite nelafihe, ya? To nani ya'ma bona'i Hu'mamofihi ka mekeheli'ahana enali tegi huto ya'ma lilube luto lu'ohuna kana'a nabaga'ni moneko'i o'yo lilube to komopa'nigu o'e lilufihe luto lu'ohuna ya'ma futu'a lolo mehilifihe? ¹⁸Hu'ma ai lamana'amofihi afo'afita nohigo nani keke pana'a nohunamofita henabe luto moneko kumu o'yo luto to o'e luto lilube? ¹⁹Hu'mamofihi pana'a Yesu Kilisito ai hapa'a ya'ma nani hiti to Silasi

to Timoti lali lu lepi'ohuta bo ai ya'ma kaga lu'ehina luga'a o'yo luto nohigo luga'a futu'a lolo huto o'e luto faga lilata menohibe. Asaga'i ya'ma lama'naka'a lu'ehinaloti legeya'ago ho baga ilata nohibe. ²⁰Hu'mau lu limi'ehina ka'a fato fato'mofihi ya'ma ai'a kago legeya'a holata nohibe. Yana'mu ya'ma Hu'mamofihi fayaha'a mino baga ito nominabe, luto Yesu yabe luto lama'naka luto Hu'mamofihi fokehi lulata nohune. ²¹Hu'mamofitinifu lenali hiti Kilisitotoga lele'mo malago minoba minoba hilutamo ni'ibe. To Hu'mamofitinifu ya'ma ai'a lili'nalo lele'mo eto hu'ehinamo ni'ibe. ²²To ai'a bona'a minalune luto komopatigu keya'a molo leto'ehinamo ni'ibe. Ai aliha'a lele'mo laga hina huto mino baga ilinamofihi babeyafa'a lolo huto ya'ma ai Sikalafu'a komopatigu molo letago mino'ehinamo ni'ibe.

²³To naniya lenalitoga mebu'ohuna hapa'a ma huto ni'ibe. Nani Koliti metoga buto ka lepekito lenele'mo sibina hu lalube luto kehelugo keheli'ohuna keta nebesigo mebu'ohunamo ni'ibe. Kaga ya'ma komopa'nigu bu nogoloto nohina bo Hu'mau keheligo bati higo lu nolepuke. ²⁴To lenali keheliya ise'natinimofihi amuya melete nehabe, ya'ma keheli'ohutamo ni'inaya lenalitoga buto nani kibina bo lolo hilube luto mone melu'ohube. Fa'mene lenalitoga komopatinigu enegelo bilibe luto lenele'mo bati huto foya'a lilata nohube.

2 ¹Nani ma luto keheli'ohuna. Keke'i lilana nasana li huto hu lepi lalugihe luto kehelugo keta nebesigo lenalitoga mebilube luto komopa'nititu lu laga hu'ohube. ²Nani'ni keke'i luse nasana lepilenogo'ni mone kiyi'agi komopa'nigu le'mo bati hi netalabe? Lenalitinisigo nehabe komopatinigu keheli sibina hinogo ya suhi mehilube'mu hube. ³To lenalitini ana'ina lilata hi'ahana le'mo fe lilabe luto fayaha nasana koyapa'i koyoto lepi'ohunamo ni'ibe. Lenali ya hilenogo nani lenalitoga bugo komopa'nigu le'mo bati hi nete'ahana aku'i komopa'nigu laga mehilina nasana lolo hi nete lalabe luto ya'ma ya hu'ohunamo ni'ibe. Laliti'mu ya'ma luto nokehelube. Nani komopa'nigu negelo bise'na kehelutita komopatinigu lenegelo bise'na li huto hu lepilibe. ⁴To komopa'nigu keheli sibina hu'ohube, to komopa'nigu hepuhi lago lenali kumu yibi sipi huto fayahi ya'ma koyo lepi'ohuna to komopatinini le'mo sibina hilube luto ni'igopa komopa'nigu lenali kumu ya'ma amuya moloto nohube yamofihi hapa'a lenelepilube luto ya'ma ana fayahi koyo'ohuna yabe.

Foipa foya lilata bomofihi kolotanana'a li he'mi etalana ka'a

⁵Bo mone kumu luto fayahi koyo'ohuna ai ya'ma komopatigu laga mehina nasana li'ehina ya'ma nanigo'i lolo mehu netabe. Lenalitoga luga'a hiti komopa'nigu laga mehinana li'ahanamo ni'ibe. Li nupa linogo'ni ya'ma botoga keta hu lalibe luto asaga bona'i hiti yamofihi lolo hu leto'ehinamo

ni'ibe luto melu'ohube. ⁶lenali asaga'magita osahi emite ana'ina le'mo fe lite lolo hilana ya'ma anasilo su halube'mu hibe. ⁷Yatai ya'ma boya komopa'agu sibina hinogo mono'i he'mi su ho lalibe lite foipana'a pa so etete le'mo bati hilo. ⁸Ya hu'ehina'mu ya'ma lenemehi emite komopatinimofihi hapa'a lepilabe luto lenegekesa lito lenoloka nohobe. ⁹Nani ma luto le'mo bati hulata nasana'mu luto yata'a fayahi koyoto lepi'ohunamo ya'ma ka'ni kehelilafihe luto yamofihi hapa'a huto hilibe luto fi taga hu lepoloto koyoto lepi'ohunamo ni'ibe. ¹⁰Lenali bo mone'mofihi foipana'a li pa so etelago nani ana huto li pa so etolata nohube. Ai'a foipana'a lu huto hu'ehina ya'ma li huto hu neto'ehina ni'igo ya'ma pa nosobe. Ya hu'ehina lenali kumu kehelito Kilisitohi bulo ya'ma ¹¹Satau ai fi taga hu letoto lebe ligi lalibe luto foipana he'milata nohube. Satau ya'ma ana'ina lolo hu letalube luto kehelilata nohina'a akeheli su ho'ohune.

Polu Toloasi hepato nohuto ekesa loe lae hu'ehina ka'a

¹²⁻¹³Nani Kilisitohi ka lamana'a lu yege halube luto Toloasi hepato nonehetugo Hu'mau ai'a kapo li hokolo hu netago keheliloto'ni bo mone nalalu'nifu Taitasiu ai meago yabe luto sa sa huloto'ni negekesa loe lae higo ana hepato bona'magi nayahi epito he'mi epoloto Masetonia kapoga buto sa hilube luto bu'ohuna yabe.

Kilisitohi ka'a lu huto huse'a nohune

¹⁴Akae. Hu'mamofihi legelo bi emilune. Hu'mau ai'a Kilisitotoga lele'mo hepilago ai foipana he'mi leto'ehina'mu fokehi hoto kanipo filata nohuto'a megesa'alo lele'mo leli'ali nohina yabe. Ya higo lali noto notoga buto ka'a lu noepinogo ana kagauba hetofa tu'a tili tele huto nobina suhi huto noto noto i futili huto nobibe. Ya'mu lali Hu'mamofihi keke'i lu etoto legelo bi emilune. ¹⁵Lali Kilisitohi tu'a lamana'a legi huto nohutita Hu'mamofihi kuguhi koyo emilago bona'i enubuto bito noenele'mana bona'i hiti to yabalugu limilata nehana bona'i hiti ya'ma tu'a enoholata nohibe. ¹⁶Foipanamofihi nasana lolo hi'ahana enali tu nebite fililata nehana nasanamofihi tuguma'i enahago fililata nehabe. To lubuto bi'ehina bona'a lali tu nebite minolatanamofihi tu'a loholoto lele'mo mopo higo kosaba lemechito lolo huto minolata nohune. Foya yamofihi asaga bona'i enali'ani amuya'aniloti bati mehu'ehigo aku'i laliti ya'ma lilune. ¹⁷Lali bona'i luga'amagi hite melete nehana'a nehana ya suhi lolo hulata menohune. Bona'i luga'a asagatoga Hu'mamofihi ka'amu kehelilago kefahi li huto hu epilina nasana lolo hulago foya'a li etelata nehanaya lali ya'ma komopati lamana hinogo minaluta Hu'mamofihi bulo buto Kilisitotoga i hepiloto mono ka'a lulata nohune.

Lu mu tifise'namofihi ka'a kosaba'namofihi foya'a lilata nohune

3 ¹Lali ligiti li ho tilune luto ka'a yamofihi aku'i hapi fi'ohutamo ya'ma ni'ifihe? To bona'i luga'amagi enigi'ani li ho tilata nehana

suhi huto lenalitoga fayahi melenogo bilibe luto lali hapatimofih
 fayahi mone koyoto lenelepilupihe? To lenali ligiti li ho tite fayahi
 keyenogo lito buto fato bonatoga epilupihe? ²Ya suhi huto meni'ibe. Nani
 foya'nimofih fayaha'a lenali ya'ma nehabe. To fayahi koyolata nasana
 ya'ma komopatigu fayahi koyolago bona'i asagatoga bu gelete leka sete
 kehelilatana ya'ma ni'ibe. ³Lali lenalitoga foya lilago lenali Kilisitohi
 fayahi koyolatana'a lolo hilago ya suhi huto hapa'a huto huto ni'ibe. To
 fayahi koyolata nasana ya'ma nagamitu mekoyo'ehibe. Amuya moloto
 minoba minoba bo Hu'mamofih Sikalafu'uba fayahi koyo'ehina ya'ma
 fa'mene lapelegusa efato meni'ibe. Komopatiniguya fayahi koyo malago
 ni'ibe.

⁴Lali ligiti li ho tilune luto meni'ibe. Lali Kilisito kumu yabe luto
 Hu'mamofih amuya'alo minoto ai gi'a li ho tiluta ni'ina'mu nani ya'ma
 nokoyobe. ⁵Foyatimofih legeya'a mone laligitati huto hulata nohibe luto
 ya hu tegi ka luto keheliloto kehelise'nati amuya moloto mone meminebe.
 Ana'ina lolo hutogo bati hulata nohina ya'ma Hu'mamofitogati yamofih
 ni'ibe. ⁶Hu'mau ai'a ya'ma lele'mo bati higo lu mu tifise'namofih ka'a
 kosaba'namofih foya'a ya'ma lilata nohune. Lu laga hi'ahana ka fayahi
 keye'ahana ya'ma keheliya ise'namofih foya ni'igopa Sikalafu'i li emilata
 foya'a ni'ibe. Lu laga hi'ahana ka fayahi keye'ahana yauba lemehati
 filise'na li huto hu limilata nohibe. To Sikalafu'uba minoba minoba huto
 lemehati minolata nasana ya'ma li huto hu limilata nohibe.

⁷To Moseu keya ka lu'ehina ka tafa komopati sibina husemofih
 li huto huse nasana ya'ma lapelegusa efato fayahi koyo'ehina ya
 nasanauba ni'igopa Hu'mamofih fana meha'a huto hu'ehinabe. To ana
 keya ka lu'ehina kamofih fana meha'a ya'ma minoto su meho'ehina
 Mosehi gobisalo fana mehi yanauba sipi ni'igo Isilaeli bona'magi enali
 analo henetite bu okaba'a silifi'auga enubu hago okaba'a bu go bati
 mehi'ahanamo ni'ibe. ⁸Mono ka tafa'amofih fana meha'a ya suhi huto
 mino'ehinamo ni'inaya Sikalafu'uba mono ka kosaba'i yatai li huto
 hu limilata nohina yamofih fana meha'a le'mo inomo tinogo sipi'a
 minalibe. ⁹Komopati li sibina hulatamofih lolo huse'na yamofih lu
 mu tifise'namofih ka fana meha'a ya'ma imo limito ni'ibe. To foipana
 meni'igo minolatana mone'a yamofih foya'a fana meha'a ya'ma mone'a
 tito ni'ibe. ¹⁰To tafa'a lu mu tifise kamofih fana meha'a ya'ma fenene
 hu'ehibe. To lu mu tifise kaga kosaba'namofih fana meha'auga napa'a
 huto be ligito minoba minoba hilana'mu yabe. ¹¹Ana'ina minomo buto su
 halinamofih fana meha'a ya'ma napa huka huto hu'ehinamo ni'ilinaya
 ana'ina mino lito buto mino foto'i molose'na yamofih fana meha'a
 minomo tito sipi'a mino'ehina.

¹²Lifita ilata nohuta nasana ya suhi huto ni'inaya mono ka keta mehuse
 huto lu aku toto lu yege hoto epilata nohune. ¹³Ya nohuto Mosehi suhi

huto menohune. Ai Isilaeli bona'magi ya'ma fana meha'a besa besa loto mino'ehina yamofih su halube'mu nohigo ete bu ge lalabe luto golaga bagalo gu'motu ifi to etago minolata hu'ehina. To lali Hu'mamofih kosaba ka molo'ehinamofih fana talina'amu fala mekiluta nohune. ¹⁴To enali komopa'ani fi hekini lago mineme bite nehago Hu'ma lu mu tifise'namofih kaga tafa'a yauba aku'i ifi tago enali kaga leka sete keheli bati mehi'ahanamo ni'ibe. To ifi tete sa gi'ahana ya'ma fa'mene mone gulu mefalina'mu yabe. Kilisito moneko'uba gulu foto li he'milata bo nohinagihe. ¹⁵Isilaeli bona'i enali yatai kana ya'ma Mosehi fayapofih ka'a leka selata nehite kehelise'na'ani ifi tago menekehelibe. ¹⁶To komopa'ani li gelehe hite Sipi Bomofitoga minenogo ai ifi tete sa gi'ahana ya'ma gulu fo epalalina'mu yabe. ¹⁷To Sipi Bo yabe luto noluna ya'ma Sikalafu'mofi kumu nolube. To Sipi Bomofih Sikalafu'uba minolata nohinaga ana'ina moneuba naga'i letalina'a meni'ibe. ¹⁸Lali ya'ma logobisati aitoga ifi toto sa megiehinogo Sipi Bomofih fana meha'a gapo gapo'i legitanagu bu galata suhi huto Sipi Bomofih fana meha'a bu goto nohutogo ai fana meha'aua fi fana to letoto lele'mo gelehe higo Sipi Bomofih suhi lolo huto nohuta yabe. Ya'ma Sipi Bomofih Meha'a ai ya hu letalata nohibe.

Lugufa'a ya'ma somo kele'a ya suhi huto ni'ibe

4 ¹Hu'mau ai keke'i luse'namu foya'a yamofih lu leto'ehinamo ya'ma to komopatigu keta mehina'mu kosele'i kasele'i mehone. ²Ya nohutoti foipana amuya'a hiti huto hu lalibe luto suguna huto sibi hapa'a lilata nasana lemegesa hu emiloto mone fagamofih gupisalo minoto Hu'mamofih ka'a li sibina hulata ya'ma ya suhi menohune. Lali Hu'mamofih bulo ai'a ka'a lu aku toto ma'naka luto lu huto huto lu noleputogo bona'i asaga'magi lali hapati keheligo fu luto ni'ibe. ³To ka lamana'a lu yege nohota sapuya'a lutita ya'ma enali yabalugu limilata nehana enalitogago noluna ya hulata notine. ⁴Enali ya'ma ana metogati gihiti bo moneuba gi'a Satau, ai komopa'ani fi hekini lago Kilisitotoga keheli meemise neminabe. To ai komopa'ani fi hekini lago enali ka lamana'amofih fana meha'aua komopa'anigu limilenogo Kilisito Hu'mamofih babeyafalo nominana bomofih fana meha'a bu go fe lite bu menegabe. ⁵Lali mono ka nokehelito laliti'mu lu lepiluta'a mehune. Yesu Kilisito ai lali'i Sipi Boti to lali Yesu kumu yabe luto lenali koko panatini lolo huto minoto minalune luto lu lepilata nohune. ⁶Hu'mau ai koyapa'i metepuhi ni'inagu fi besa lobo luto ligo go'i lu besa lo'ehina. To ai'asigo ya'ma lulago komopatigu ai'a kamofih fana meha'aua mino kikipa hago Kilisitoi gobisalo Hu'mamofih silikeha fayaha'a huto hu lamana nohigo bu golata nohune.

⁷To lali ai fana meha'a komopatigu li'ohuta bona'magita fa'mene bona'i lugufa lapa mebi'ehina bona'i nohune. Ana'ina mone hetofa hatofanamofih

mina'a ti'ehina'a sa megise bati mehina kapogu malalina suhi huto fana meha'a ya'ma komopatigu limi'ehina yabe. Henabe? Ai kagamofihi amuya'a lalitoga meni'igo ai Hu'mamofitoga ni'ina yamofihi hapa'a huto hilube luto yabe. ⁸To laliya keke'i luse'namofihi gupisalo nohutogo yanauba lele'mo tili tele hilina'a meni'ibe. To legekesa loe kehelito negi no'ohuta yamofihi kehelutogo sibi mehu'ehibe. ⁹Fatehati lolo nehanamagi babu lite kalana'i nemeletago Hu'mau afotifu menohe'mi letana yabe. Kalana'i mele letete ya nehanogo lagabu'i gilago sibigopa filito fenene mehune. ¹⁰Ana suhi huto Yesu minoto lito hu'ehinamofihi komopa'a ana huto lugufaga huto hilibe luto lugufagati Yesuhi he nefiligo mino'ehina babeyafa ya'ma lito humofa'na hulata nohune. ¹¹To lali lubu hiti nohutogo kana'mu kana'mu bona'magi enali Yesu kumu lite lali ete nehete nehete hite lele'mo sibina sabana hite fililatanagu lele'mo melelata nehana yamofihi Yesu minoba minoba amuya'amofihi ya'ma lali fililuta lugufaga huto hilibe luto ya suhi huto huto hu limilata nohibe. ¹²Ya hulago lalitoga fililatanauba foya'a lilata nohibe, to lenalitoga ule'ale huto nominana nasanauba foya'a lilata nohibe.

¹³Mono bukugu fayahi ka mone ma lite keye'ahanamo ni'ibe: *Nani aitoga nemehi emilata nohuto'ni ka lulata nohube*. Ya lite keye'ahago lali ana legegeto aitoga keheli amuya mololata nohutoti ka'a lulata nohune. ¹⁴Ya nohutoti ma luto kehelilata nohune. Hu'mau Sipi Bo Yesuhi fili'ehinagati le'mo ho ti'ehina ai suhi huto lali hiti ana huto lele'mo ho tiloto lenali hiti Yesu ai nohinalo lele'mo malalube'mu hibe. ¹⁵Lali asaga nasana ya'ma lenali kumu yabe luto lolo huto moloto hulata nohune. Hu'mau lehe'mose'namofihi nasana i tili huto binogo bona'i asaga'magi kehelilete Hu'mamofihi foke ka lite enegelo bi emite Hu'mamofihi fana meha'auga bu бага o бага ito minalibe.

Lali keheli ule'ale huse'nagu nominone

¹⁶Lali ya hu'ehina'mu yabe luto kosele'i kasele'i mehene. Lugufati lagabu'i gilata nohinaya kana'amu kana'amu komopatigu lele'mo amuya hulata to kosaba'i asaga yupahi limilata nohibe. ¹⁷Metoga kalana'i mele letalana nesi'a yamofihi su halina yanauba sekele mamu'amofihi laga hina'a su mehose minoba minoba hilina'a li huto hu limilibe. Ana sekele mamu'a limilina'a yanauba lali kumu kalana'i nemalana li'ohutana be ligilina'mu yabe. ¹⁸To ya huto ni'igo lali ana'ina keta'a hiti li limilata nehana yanauba ni'igopa ana'ina suguna nasanauba huto hu limilibe luto ana kegi'a komopatigu bu goloto minolata nohune. Ya'mana metoga ni'ina lubutu bu golata nohuta nasana yauba fa'menena lolo hilina'mu yabe. Ya'ma lubutu bu menogotanauba amuya moloto mino foto'i moloto minoba minoba huto minalina'mu yabe.

5 ¹Lali ma luto kehelilata nohune. Ya'ma me lugufamo fulupa ilina nohi legita ni'ina to tele bilenogo Hu'mau kokulumagu minoba

minoba nohi mone li huto huto molo leto'ehina yamofih i bona'magi enayatu meg i'ahana fa'mene Hu'mau ai amuya moloto minalina nohi hepa'a gi'ehinamo ni'ibe. ²To lali ya'ma ya hu'ehina'mu kokulumagu nohi li huto huto lelepilibe luto laga'a keheli'ohuto amuya nomolo fa'mene lugufamo hiti minolata nohuta'mu yabe luto kiligi ito minolata nohune. ³Lali lemehati yupa'i mino lalibe luto yamofih i kokulumagu kosaba lugufati nohi suhi huto lito li hepinogoti bati hilibe. ⁴Lali ma metoga nonugu nohuto yanamofih i keke'i luse'na keta keta nolebesigo kiligi ito nohune. Lali ya'ma me lugufati, nohi tafa'a legi huto ni'inana ya'ma mone'na heti he'milune luto menokehelune. Tafa'a gukete fa'mene ni'inogo kosaba gukete lito li hepito minalune ago kehelilata nohune. Ya nohuto filise'namofih i nasana lolo hu'ohuta ya'ma amuya moloto minoba minoba hilutanauba mikili halibe luto lulata nohune. ⁵Ananamofih i lamana'a ya'ma huto hu limilibe luto le'mo babahi hu leto'ehina ya'ma Hu'ma ai'asigo nohibe. Ai ya huto lele'mo hetofa hilina nasanamofih i babeyafa'a ya'ma ai Hu'mamofih i Sikalafu'iya molo leto'ehibe.

⁶Lali yamof i kumu keheli eminogo komopati le'mo hetofa hu letelenogo koli mehuse minalune. Ya nohutoti ya suhi huto yamofih i kehelilune. Me lugufa hiti minolata nohuta kana'a ya'ma Sipi Bomo sa huloto kame hepato nominone. ⁷Yatai kana ya'ma komopatitu Hu'mamofih i ka'amo'mu kehelutogo amuya moloto nominana ya huto ni'ibe. Legeya'a ya'ma mele'isi bu mego'ohune. ⁸Ya nohutoti sibi komopati le'mo hetofa huto nohinogoti lugufatu kame hepato nominotamofih i ya'ma he'mito koto hepatoga Sipi Bo hiti minolata'a yamofih i laga'a kehelilata nohune. ⁹Minolatana yamofih i ya'ma metoga kame lugufa hiti minolata nohuta'afi to ifoga koto hepatoga minaluta'afi ya'ma Sipi Bouba bu legenogo bati hilibe luto fana hoto minoto lito hulata nohune. ¹⁰Yamof i kumu ya'ma luto ma keheli'ohune. Mega lugufa hiti nohuto ana'ina lito moloto hu'ohuta bati huto ni'ifi to sibina huto ni'ibe yamofih i mone kegi'a ai eto eto huto kaga loko huto pa sose'na limilibe luto minoto lali asagatoga Kilisitohi ka foya kefa hisalo ho tiloto kululu tito nehetilune.

Hu'mau lele'mo bati hulenogo ai hiti hepito minalutamofih i ka'a

¹¹Sipi Bomo lelesa nolinogo nohuta ni'ibe. Yamofih i keheli'ohutoti bona'magih i enegekesa lito ka lamana'a keheli emilo lu epilata nohune. Hu'mau ai hapati asaga'i bu golata nohibe. To lenali ana suhi hite hapa'ni ya'ma komopatinitu kehelilata nehafihe luto nokehelube. ¹²Lali ya luto linogoti keheli'ehinogo lali ya'ma ligiti le'mo ho tilune luto lu noleputa'a meni'ibe. Lenali fa'mene lali kumu keheli bati hinogo netinogo lenali bona'i luga'amagih i komopa'ani topa mehanogo minete enugufamofih i nasana'muko kehelite enigi'ani li ho tite minelata nehana'a yamofih i nani hapa'ni lu epinogo keheli bati hilabe luto nolune. ¹³Lali kumu negi

bona'i yabe lite li'ahanamo ni'ifihe? Ya'ma Hu'mamofih i foya'amu yabe luto ni'ibe nohune. To legekesa yigise'na bati huto ni'ibe lite li'ahanamo ni'ifihe? Yamofih i lenali kumu ni'ibe nohune. ¹⁴Ya hu'ehina'mu Kilisitoh i ai meha'a limilata nohinauba lele'mo hetofa higo lalitigo lugufati lelito tiluta'a meni'ibe. Lali ya'ma luto keheli emilata nohune. Ai bo moneuba lali bona'i asaga kumu yabe luto fili'ehinamo ni'inagihe. To lali asaga'i ana suhi huto tafa hapatimo'mu fili'ohuta'a ya'ma keheli'ohune. ¹⁵To bona'i asaga kumu yabe luto fili'ehinamofih i ya hu'ehina'mu lubu hiti nohuto yamofih i lalitisigo minoto lito mehuse ai kumu luto minoto lito hilune.

¹⁶Yamofih i lali melugu bona'magi kehelise'na mege'i mololoto hapa hapa'ani lu su meho epalalune'mu hune. To lali koyapa'i ya huto Kilisitoh i ana huto gufa'amofih i hapa'a bu go'ohuta, ana babeyafalo yata'isi ya'ma aku'i mone bu megone. ¹⁷Ya hu'ehina'mu bona'i moneuba Kilisitotoga hepiloto molo emi'ehilina ai yuhufana lolo nohilibe. Tafa hapa'a su ho etolago kosaba hapa'a ahuto hu'ehilina yabe. ¹⁸Ana nasanamofih i legeya'a ya'ma Hu'mamofih i nasanago ni'ibe. Lali koyapa'i ai fatehe bona'a mino'ohutaya ai'a ya'ma Kilisitoh i kumu luto lele'mo fulu hulago ai'a bona'a nominone. To ya huto lali bona'i luga'a ya'ma ana huto enele'mo fulu hilina ka'a lu epilabe luto lu limi'ehinamo ni'ibe. ¹⁹Lu limi'ehina'mu Hu'mau ai'a Kilisitoh i ho lifigo oto minoto metoga bona'i asaga'i hiti ai'a hiti enele'mo ketipa ilube'mu huto mino'ehibe. Ya huloto foipana'ani li he'mi epololoto aku'i leka so su meho'ehina yana'mu ka foya melilina'mu yabe. To lele'mo ketipa iloto kaga'a ya'ma folagahatigu molo leto'ehinamo ni'ibe.

²⁰Ya hu'ehina'mu lali Kilisitoh i ka'a leli'ali bona'i Hu'mamofih i ka lamana'a lu lepilata nohuta keheliloto lenegekese lito ya'ma Hu'mau lu lepilata nohina suhi huto nohune. Kilisitoh i kumu Hu'mau lenele'mo fulu hinogo aitoga bite hepilo. ²¹Kilisitoh i ai foipana'a meni'ina bo ya'ma Hu'mau lali kumu luto lali foipanati ai gupisa'alo molo eto'ehina. Hena'mube? Ya'ma lali Kilisitoh i hiti i hepiloto Hu'mamofih i bulo fotogo huto minalune luto yamofih i lolo hu'ehina.

6 ¹Hu'mamofih i le'mo bati nehana bona'i lali lenegekese lito ma luto lu lepilata nohune. Hu'mamofih i lehe'mose'na'a molo lepalalina buto fa'menena lolo mehino. ²Hu'mau lu'ehina ka'a ya'ma ma huto ni'igo kehelilo:

Nani lenehe'mose kapo
 hokolo hu'ohuna kanagu
 lenali ka keheli'ohunamo ni'ibe.
 To lenubuto bise kanalo
 lenele'mo bati hu'ohunamo ni'ibe.
 Ya lu'ehibe.

Kehelilo. Kana lamana'a yata'isigo ni'ibe, lubuto bise kana ya'ma ana huto yatai ya'ma ni'ibe.

³Lali ana huto bona'magitoga foya lilata nohuta'mu kosele ka li lalabe luto yamofihhi mono kaga behelefe limi lalabe luto ya mehu'ohune. ⁴Lali Hu'mamofihhi foyalo bo'a nohutagihe yamofihhi hapa'a li huto huto ma luto molo lito bulata nohune. Keke'i luse'namofihhi gupisa'alo nohutoti to ufeha'a hiti nasanamofihhi gupisalo minoto to i'i o'enamofihhi gupilo mino'ohuta yatai ketipanamofihhi komopa'agu nominone. ⁵Segi osatu ite i kehe li keheli nehago naga nonugu mino'ohuta kalana'i melete lehalune'mu nehago minolata hu'ohutamo ni'ibe. Keke'i luse foya lito nohuto, lubu'i mekose ho tiloto nohuto nose'nati menose minomo buto nohutogo Hu'mamofihhi foyalo bo'a nohutamofihhi hapa'a ya'ma huto huto hulata nohibe. ⁶Ya huto nominotaya komopati besa lago nohuto kehelise'na minoto komopati fulu higo minoto lalalutigihhi noenehe'motogo Sikalafu'i hiti minoto komopati bati huto epilata nohune. ⁷Lusiga luto ka legeya'a noluto Hu'mamofihhi amuya lito minolata nohune. Lamana'a ni'igo nominoto'a nohutogo yanamofihhi gimii mage'a helegu'a lolo huto lito nominone. ⁸Ligiti le'mo ho tise'namu to lubuya huse'namofihhi folagaha'agu minolata nohune. To lofokehi lilatana to libe pigi bibe hilata nehana yamofihhi folaganugu nohutogo Hu'mamofihhi foyalo bo'a nohutamofihhi hapa'a ya huto huto hulata nohibe. Fagalo bo yabe lite neli letago faga meluse minolata nohune. ⁹Hapati'mu sa sa nehanaya Hu'mau hapati keheli su ho'ehinabe. To fililatanalo lebatu'isi ni'igo fililune'mu nohutaya fa'mene lubu hiti minolata nohune. To lahago filito bu'ohutamagita fa'menena lolo menohune. ¹⁰To keke'i luse'namofihhi gupisalo nohuto legelo biba biba huto nominone. Salafa'amofita sibigopa bona'i asagatoga mono'mofihhi fe'noha'a hiti enele'mo lolo hulata nohune. Lumuhi menina'a nohutogo komopatimofihhi fe'noha'a bai toto ni'igo nominone.

¹¹Oho, Koliti bona'ise. Komopa'ni ya'ma lenalitoga babu luto ni'ibe. To labaguti lusiga luto lu nolepune. ¹²Laliti yamofihhi komopati amuya moloto lenele'mo hetofa hulata nohune. Lenali lenemehi limilata nehana yamofihhi nesi'asi ni'ibe. ¹³Lenali kumu kehelugo pa'ni pana'ni lolo nehago kaga'ni ya'ma lu nolepube. Mone kegi'a beleha'aga pa sete ana hite lenemeha'a nanitoga melenogo mineno.

Hu'mamofihhi mono noha'a nohune

¹⁴Hu'mamofihhi ka mekehelise bona'magitoga bite mino hepite koguna lolo mehilo. Lamana'a hiti to laga mehinana hiti etali hena hite i hepite menala'ibe? Ya'ma i mehepila'ina'mu yabe. To fana mehena hiti metepuna hiti moneko kumu minala'ifiye? O'e, ya huto meni'ibe. ¹⁵To Kilisitohi ai kala bo'a Sata hiti etali hena hite komopa'atiti hena

hite le'mo hepila'ibe? Ya hila'ina meni'ibe. To Hu'mamofihika kehelito nominota bona'a lali hiti to ai ka'a menekehelina bona'i enali hiti hena huto koguna huto minalune? Ya huto meni'ibe. ¹⁶To Hu'mau hiti lugefa nasana hiti moneko nonugu minala'ifiye? Ya huto meni'ibe. Nekehelifihe? Hu'ma amuya moloto minoba minoba bomofihinoaha lali ya'ma nohune. Ya hu'ehina'mu Hu'mau ma luto lu'ehinamo ni'ibe:

Nani bona'nimagihi komopa'anigu
minoto lito minoloto'ni
enali folagaha'anigu humofa'na hilube.
To nani enali sipi bo'ani lolo huto
minalube.
To enali nani yagapana'ni lolo hite
minalabe.

¹⁷Yamu'i Sipi Bo ai ma luto lu'ehinamo ni'ibe:

Nanitoga mekehelise neminana'a
he'mi epelete foto'i minalo.
To nani lu laga hu'ehinamofihika
bati mehina nasanalolo
ya'ma li mekehelilo.
Ya hilenogo nani'ni kaba hu lepoloto
lenele'mo hetofa hilube'mu hube.

¹⁸Ya huloto'ni afotinifita minalube,
to lenali ya'ma pa'ni pana'ni lolo hite
minalabe.

Ya'ma Hu'ma amuya bouba
huse mehuse suhi huto
ai'a kaga'a ya luto lu'ehinamo ni'ibe.

7 ¹Nemehi lepi'ohuna nalalu'nigitabe. Hu'mau ya'ma ka lali kumu lu molo'ehina yabe. Ya'mu lali komopati to lugufati le'mo sibina hulata nasana asaga'i li he'milototi komopati gulu gulu linogo Hu'mamofitoga koli'a hiti minalune.

Polu komopa'ni li gelehe hana'mu gelo bi'ehina

²Lenali komopatini lalitoga malalo. Lali lenalitoga li sibina mehu lepolo'ohune. To bo mone'i le'mo sibina mehu etone. To lenipagu fito ana'inatini mone li sibina mehu'ohune. ³Nani ka ya'ma lenifisa ilube luto lu melepolo'ohube. Nani koyapa'i lu lepi'ohuna ka mone aku'i yatai lu lepilube. Lali lenali hiti moneka minoto lito fililuta ni'ifi fa'mene minaluta ni'ifi ana suhi huto mino lito buto minalune. Komopa'ni lenalitoga mino'ehinamo minalube'mu hibe luto alu lepi'ohunamo ni'ibe. ⁴Lenali Hu'mamofitoga ule'ale hite neminana komopa'ni hite keheliohuto lenofokehi nolube. Lenali komopa'ni le'mo fulu nehago

keke'i luse'namofihigi gupisalo nominoto'ni bati huto minoto negelo'ni sipi nobube.

⁵Masetonia kapogu oto neheti'ohuta mone'a labasu mebune. Ya nohigo kalana'i melete lugufamofihigi luba'a hilata to komopatimofihigi lelesa luse'na yanauba luga luga huto huloto lele'mo loe lae huto mino'ohutamo ni'ibe. ⁶Ya huto nohutogo megusa yagapana'magihigi komopa'ani le'mo bati hulata bo Hu'mau ai ya'ma Taitasi le'mo gelehe hilago oto le'mo amuya molo leto'ehina. ⁷Ya huloto i gelehe huto o'ehinauba ya'ma anasi lele'mo bati hu'ehinamo meni'ibe. Lenali aimo le'mo bati hi'ahana ka'a ya'ma lelito ago kehelilototi komopati ketipa igo nohune. To nani'i bu nagalune lite kehelite minelata hi'ahana to foipa nasana huto hu'ehina'mu leniginaga figo mineme bite neminana to nani kumu yabe lite fi hetofa hi netete amuya meelata nehana'a ya'ma ka'ni lu nimilago yata'isi komopa'nigi keheligi bati huto kehelugogi tigo nohube.

⁸Nani koyapa'i fayahi mone koyo lepito leka sete kehelite komopatini keta hu'ehina yana'mu yatai komopa'nigi kehelugogi keta mehige. Fayahi luto koyo'ohuna kanamofihigi ya'ma kana'a hupamone'isi komopatinigogi keheligi sibina nehago keheliloto'ni lama'naka komopa'ni keheligi sibina hu'ohunamo ni'ibe. ⁹To yatai ya'ma komopa'ni bati nohigo nolube. Komopatini sibina hu'ehina ya'ma yamofigi kumu lenipagugi keta hulatanamofihigi komopatini i gelehe hana'mu luto nipagugi lama'naka keheligi bati nohube. Lenali leniginaga fi'ehina ya'ma Hu'mau keheligogi lamana nasana lolo hulagogi keheligi'ehinamo ni'ibe. Ya higo nani kaga'ni lenele'mo sibina mehu'ehige. ¹⁰Hu'mamofihigi kamu'igi liginaga filata nohinanamofihigi le'mo gelehe hulata nasana li huto hinogogi Hu'mau lubuto binogogi minalune. Yamofihigi liginagagi fise nasana yamofihiga'a li huto hilina aliha'a ya nasana'mu kehelinogogi mone sibina mehilube'mu hige. To mono'igi mekehelise bona'igi ginagagi fise'na yauba negi nagi nasana li huto nohigogi filite bilata nehabe. ¹¹Bu galo. Ginagagi fise'na ya'ma lapa mebi'ehige. Yamofihigi lenalitogagi legeya'a nesi'a huto mehu'ehige. Legeya'a sipi'a ahuto hu'ehige. Hu'mamofihigi kagalugogi lenele'mo babahigi huse'na to hapatini bati huto le'mo huto huse'na to foipa nasana fitu fose he'milata huse'na sipi'a to Hu'mamofihigi ita bise'na lenelesa luse'na to nani kumu keheligiya ite amuya molose'na, to foipanamofihigi mone kegiga'a epilata'na ya'ma nasana ya hina'a li huto hu'ehina ya'ma lenalitogagi nona'a huto hulagogi lenali foipana memino'ehinamofihigi hapa'a huto nohige.

¹²Ya hu'ehina'mu koyapa'i fayaha nasana ma luto koyo lepi'ohuna yamofihigi foipana'a lilata bomofihigi ai kumu luto meni'ibe. To foipa nasana lolo huto molo eto'ehina bomofihigi ai kumu hiti luto meni'ibe. Kaga'a lu lepugogi Hu'mamofihigi bulo lenali lalitogagi malalanamofihigi hapa'a huto hilige luto yamofigi kumu koyoto lepi'ohunamo ni'ibe. ¹³To lenali ana hilete komopati le'mo kefa i'ahanamo ni'ibe.

To komopatigo le'mo hetofa hi'ahana yamofi kumu luto meni'ibe. Lenali Taitasihi komopa'a le'mo fulu hago ai komopa'agu gelo bito nohigo anamofihika ka'a ya'ma kehelito laga'a nominone. ¹⁴Nani koyapa'i lenele'mo hofa toto lenali kumu nofokeha kaga'ni ya'ma Taitasihi lu emi'ohunamo ni'ibe. To lenali kumu ka lu emi'ohuna yamofihika legeya'a ya'ma huto hu su ho'ehinamo ni'ibe. Nani ka'ni ya'ma faga hiti mone lu melepi'ohunamo ni'ibe. Ana huto lenigitini le'mo ho tito Taitasihi lu emi'ohunamofihika ya'ma legeya'a alolo hu'ehinamo ni'ibe. ¹⁵Taitasihi ai lenalitoga bulago koli'a hiti kehelika emite to keke'i li etete lenipagu melete be tigilete he'me'ahana to ka'a kehelika emi'ahana yana'mu kehelito meha'a lenalitoga molo'ehina ya'ma napa ho lito bulata nohibe. ¹⁶Nani lenali kumu keheluna ana'inatini fotogo hutogo ni'igo nugufa'ni sibina mehinogo bati huto minalube'mu hube. Ya'ma komopa'nigu bati nohigo nokehelito lu nolube.

Mono kumu lite efahi li nupa hilanamofihika ka'a

8 ¹Nalalu'nigita, Masetonia hepatoga agoya hi emise bonatoga Hu'mamofihika he'mose'nauba lamana'a lu huto hu'ehina yamofihika lu lepilube. ²Enali eniginaga fise gofana yamofihika komopa'agu minete salafa'a mine'ahanauba fa'menena lolo hinoga komopa'anigu sabiyana sipi huto lolo higo efahi li nupa hi'ahanamofihika nesi'a meni'ibe. ³Nani enali hapa hapa'ani kehelika bati huto kehelika'ohuto nolube. Enali'ani enegekesa kehelite babahi hite enali efaha'ani epite amuya'anilo molo legege hite lagaso'a mone'i tite mine'ahana. ⁴Nani enegekesa lito ya mehu'ohugo enali'ani kehelite logo'na hete Yutia kapogu Hu'mamofihika bona'amagihika komopa'ani bati hinoga kehelilana nasana li huto hite ene'mo bati hilana kefahi epilane lite loka heba heba hite li'ahana. ⁵Ya nehite ana'ina nesi'a lolo hilune'mu nelafihe, luto nokehelugo ya hi'ahana yabe. Yata'a ya'ma Sipi Bomofitoga komopa'ani kehelika emilete Hu'mau lilina malalina'a hilune lite lilete lalitoga hiti komopa'ani limilete mine'ahana. ⁶Enali ya suhi hilago Taitasihi ya'ma lenali komopatini kehelika bati hilana foya hapi fi'ehina ya'ma li su hoto lilibe luto yamofihika lu eto'ohuta yabe. ⁷To kehelika ule'ale hise'natini to Hu'mamofihika ka lu yege hose'natini to mono'i hapa'a kehelika fe lite kehelise'natini to mono'mofihika foya'amua amuya molose'natini to lenemehatini epite lehe'mose'natini limilata nohina ya nasanamofihika legeya'a babu luto huto hu'ehina'mu yabe luto komopatigu kehelika bati huse foya lilete kefahi li nupa hilana'mu ana hite keta mehuse hilabe luto nolube.

⁸Nani lenoga'na bito melu'ohube. Mono ka nekehelina bona'magihika luga'aga ana foya'mu babahi hi'ahabe. Yamofihika lu lepinoga'ni lenali ene'mose'na legege hite ya'ma huto ni'inamofihika hapa'a huto hilibe luto nolube. ⁹Lenali Sipi Boti Yesu Kilisitohi lehe'mose'namofihika akehelilata

nehanamo ni'ibe. Ai sekele mamu'amofihi afo'afu lenali kumu yabe luto muhi meni'ina bo lolo hu'ehina yamofihi lenali anatu mono'mofihi yogo fe'noho suhi hilabe luto ya suhi hu'ehinagi nani ya'ma lu nolepugo lenali giyaka lite ana hite bilabe.

¹⁰To kaga mone ma luto keheli'ohuna lu lepinogo'ni keheliya ilenogo lamana'a huto hilibe. Lenali ya'ma tafa foya kanagu hapi fi'ahana ya'ma yatai li su halanamofihi bati hilube'mu hibe. Lenalitini yamofihi mele'isi kefahi li nupa hilune lite lilete keta mehuse hapi fi'ahanamo ni'ibe. ¹¹Ya hu'ehina'mu molo emite lelite nebite keta mehuse hite hapi mefi'ahanamofihi suhi hite keta mehuse hite li su halana ananamofihi legeya'a ya'ma nasana mele'ehilana legege'alo li huto hilabe.

¹²Komopatinigu keheli bati hite kefa malalana ya'ma Hu'mau kehelinogo bati hilube'mu hibe. Lali memolo'ehiluta legegeeto ni'igopa ana'ina molo'ohuta babeyafalo melenogoti Hu'mau bu gago bati hulata nohibe.

¹³Enali luga'amagi lamana hite minenogo lenali sibina hite minalabe luto efahi li nupa hite epilo luto nolune meni'ibe. ¹⁴Lenali yogo fe'nohi yatai kanagu enali salafa'a enoho lifilenogo ana'ina moneko legegetoko huto hilibe lu'ohunamo ni'ibe. To minoto kana mone yupahifi enali'ani yogo fe'nohuba lenalitoga kau'na kanagu ho lifinogo ya'ma moneko legegetoko mine melete minalabe. ¹⁵Guna melete epiba epiba hilanamofihi ya'ma mono ka bukugu kaga'a ma huto ni'inamo ni'ibe:

Enali nose'na babu lite

li nupa hi'ahanamagihi enumu higo
mone he'mi'ahana'a meni'ibe.

To nesi'asi li nupa hi'ahana'amagi
mone kau'namu mefili'ahanamo ni'ibe.

¹⁶Ya'ma Taitasiu lenali kumu luto lenehe'moto fifa ilata nohuna ana legegeeto aitoga huto higo Hu'mamofihi fokehi holata nohune. ¹⁷Lali lu emutogo keheli'ehibe luto liluta'a meni'ibe. Ai'a komopa'auba bati hinogo foya lenalitoga bilube'mu hibe. ¹⁸Taitasi hiti to lalalutifu mone hiti etoho lufuna yabe. Ana bouba ka lamana'a lu yege holata nohinogo Hu'mamofihi bona'i asaga'i kehelite gi'a liyafa nehana yabe. Ai hiti Taitasi hiti etoho lufune. ¹⁹Hu'mamofihi bona'a enali ana bomofi kumu komopa'anigu keheli bati hilana kefahi lelito buto enele'mo bati hinogo moneka bilabe lite le'mo mele'ahana. Ana foya ya'ma Sipi Bomofihi fana meha'a le'mo sipi hilibe luto to komopati babahi higo enehe'malube'mu nohune luto foya lilata nohuta yamofihi hapa'a huto hilibe luto ya'ma komopati epise foya lilata nohune.

²⁰Yamofihi laga mehina ka mone huto hu lalibe luto babu efahi ya'ma legeso hite kaba hila'ibe luto etoho lufugo neba'ibe. ²¹Lali nasana lolo hutogo Sipi Bouba ai'asigo kehelinogo bati hilibe luto ni'igopa bona'magita ana hite kehelilenogo fotogo hilibe luto lilata nohune.

²²Lali ya'ma etali hiti lalalutifu mone'i hiti enoho lufutogo foiya nebase. Ana bo ya'ma babu yupahi fi taga hu etoto bu go'ohuna amuya nasanamofihi hapa'a huto hu'ehibe. Yatai ya'ma lenali kumu keheligo ule'ale nohuto amuya babu luto nomalabe. ²³Taitasihi hapa'amu kehelilune lite nelinogomo lenali kumu yabe luto ai hiti nani hiti foya lilata nohu'ina botini loemo ya'ma nohu'ibe. To Taitasigi hiti moneka bila'ina bole'i lalalutigihhi hapa'atiti kehelilune lite nelinogomo etali Hu'mamofihi ka nekehelina bona'atitimagi etoho lifigo foiya neba'ibe. To etali Kilisitohi fana meha'a le'mo saga hilata neha'ina bomale'i neha'ibe. ²⁴Lali lenali'i lenele'mo napa huto noluna yamofihi lamana'a huto hilibe lite lenali ana bona'i lenemehi epinogo Hu'mamofihi bona'magihhi li gehesa'alo li gehesa'alo lenali keheliya ilabe.

**Yutia hepatoga mono bona'magi kumu efahi
li nupa hi'ahanamofihi ka'a**

9 ¹Yutia kapogu Hu'mamofihi bona'a enehe'mete efahi epilanamofihi ka'a akeheli'ahabe. Yamofihi henabe luto aku'i koyo lepilube? ²Ana foya'mu komopatini topa nohago keheliloto lenigitini li ho tito lenali hapatini'mu Masetonia bonatoga ma luto lu epi'ohube: Hu'mamofihi agoya hu emise bona'i Akaiya hepatoga nehanamagi tafa kufugu mele'isi le'mo bati hilete kefahi huto hulata nohina kapo'a li huto hi'ahanamofihi ka'a ya'ma Masetonia bona'i lu noepugo bona'i luga'amagi enali amuya melete katini kehelilete ana foya'mu enipagu keta mehuse hu'ehina. ³Nani ana foya'mu lenigitini li ho tito lu lepi'ohuna kagauba buto fa'mene lo lalibe luto lu'ohunalo ya'ma anamoloko melete keta mehuse hilabe luto nigibo nagabo ya'ma enoho lufugo nebase. ⁴Nani'ni aliha'a nohunamofihi Masetonia bona'i hiti buto lenali kefahi li nupa huse'namu ligitagahi nehago lenele'mo bati huto lu lepi'ohuna ka'ni limi lalibe luto nani hiti to lenali hiti lubuyati hu lalibe luto yabe. ⁵Yamofihi ya'ma nani'ni nokehelugo bati higo nalalu'nigita ya'ma enogo'na hoto enoho lufugo kohe tete lenalitoga foiya nebase. Bi nehetinogo lenali kefahi epilune lite ema afetoga ka'a nimi'ahanamo ni'ibe. Yamofihi yata'a kanagu li nupa hinogo minalibe. Ya hilenogo nani lenalitoga bu nehetito lenohoka lenohoka hinogo'ni kefahi malalana'a huto ni'igopa komopatini li hokolo hite minete kefahi meelata hi'ahanamofihi hapa'amo lama'naka huto hilibe.

⁶To kefahi li nupa hilana'mu fono ka ya'ma ya luto noluna keheli'ehilo. Lenali bigaha'a nesi'a ho kafaluta ya'ma minoto legeya'a nesi'asigo lilune'mu hune. To bihi nasana asaga bihina lolo hiluta yamofihi minoto samahi tito lilune'mu hune. ⁷Ya hu'ehina'mu ya'ma suhi lilabe. Lenali fato fato komopatinitu kehelite keheliya ite kehelilana legegeto hite ya'ma kefahi he'milabe. To enipakafa hiti nehinogo bona'magi enohoka

enohoka hinogo ya mehuse komopatinigu babahi hite he'milabe. Enegelo bite kefahi he'milata nehana bona'magihi Hu'mau bu gago laga'a besilata nohinagihe. ⁸Hu'ma ai amuya bo hapa'a nohina bo keta mehuse huto ana'ina ai amuya'a huto hu lepilibe. Ya hulenogo lenalitini lenumu'i nehinogo lenehe'mose foya fato fato bona'mofihi lilune litemo ana'ina'mu sa mehilana'mu yabe. ⁹Mono bukugu ka fayahi mono bona'magi kumu mone ma luto ni'inamo ni'ibe:

Ai'a ana'ina'a guna ito salafa'amagihi
enehe'moto epilata nohibe.

Ai'a keke'i lu epolose'na'a i laga mehuse
mino lito buto minalube'mu hibe.

¹⁰Hu'mamofihi ai'a biha'a nasana li huto hu limigo hekolo'ohuta anamofihi legeya'a silaga'i huto higo lito minoto ho tito nohune. Ai'a lenali hiti minoto bigaha'a li huto hu lepi su holoto lusa gito le'mo napa hulenogo enehe'mose'natini yamofihi legeya'a mino bai toloto i futili huto minalube'mu hibe. ¹¹To amuya fe'nohatini hiti lolo hite bona'i enehe'mete fato fato bona'i hiti enele'mo bati hilenogo enehe'mose'natini legeya'a huto hilenogo enali lali kumu yabe lite Hu'mamofihi fokehi lilana'mu yabe. ¹²Lenali ya hite, Hu'mamofihi naga'a enehe'me'ahanauba legeya'a huto hu'ehina mone ana muhi menina bona'i enele'mo bati hu'ehina to mone hiti Hu'mamofihi enegelo bite babu lite neminana ni'ibe. ¹³Lenali Kilisitohi ka lamana'a kehelilete li pili kete lite neminana yamofihi hapa'a to lenali Yelusale hepatoga mono ka keheli'ahana bona'i to lenalalutigihi luga'a asaga'i enali hiti lenipagu bati hinogo kehelite babu lite enehe'melata nehanamofihi hapa'a huto hilenogo Hu'mamofihi fayahi mino бага ito minalibe lite le'mo ho tilune'mu habe. ¹⁴Ya hilenogo Hu'mamofihi lehe'mose'na'a fato suhi huto lenalitoga li huto nohina'mu yabe lite komopa'ani lenalitoga melete lenali kumu yabe lite Hu'mamofitoga buka tilune'mu habe. ¹⁵To lali Hu'mamofihi ai'a lehe'moto fi hetofa hu leto'ehinamofihi afo'afihi Yesu kumu yabe luto lu su meholatamofihi ya'ma fa'mene iyo iyo ka lu etoto fokehi lilune.

Polu ai'a foya'a le'mo amuya molo'ehina

10 ¹Poluita nani ya'ma Kilisitohi fuluna'a hiti lehe'mose nasana'a hiti kumu luto lenegekesa lito lu lepilugi kehelilo. Kehelite nani kumu ya'ma lite lilata nehabe. Lalitoga oto minoto ai'a amuya'a hiti bo menohinaya kaga'a nagami'a hiti lu lepilata hu'ehina. Ya huloto buto minoto gologaguti kaga lu lepilata nohibe. Lenali ya nelabe. ²Nigibo nalalu'nigita, lenalitoga buto minoto melugu bona'magihi komopa'anitu kehelite lilata nehanamofihi suhi huto foya'a lito nominabe lite nani kumu lilata nehana bona'i nogologaguti kaga lu epilube luto lilunamofihi babahi huto lipoti lu epilunamoya lenali luga'amagita ana suhi huto

nogolagaguti lu lepi lalugi nohoka mehilo. ³Lali fa'mene bona'i ma metoga minoto humofa'na hu'ohutamo ni'inaya Hu'mamofihhi kaga kumu yabe luto luba hulata nohuta yamofihhi metoga bona'magihhi tafa komopa'anitu kenasabo bilata nehana ya huto meni'ibe. ⁴Mono kamofihhi luba'agu foya lilata nohutamofihhi metogati gimhi mage'i huto nohuto meni'ibe. Ya'ma Hu'mamofihhi amuya'a hiti nohuto yanatu fatehe bona'magihhi fa'mene kaga'animofihhi bihu gegisa'a tele bilata nohune. To enali amuya moloto li pigi binogo ni'igo, ⁵Hu'mamofihhi hapa'a keheliya ise'namofihhi kapo'a hekini lalune'mu ana'ina lite enita bise kaga'ani li nohe'mune. To Kilisitohi agoya hu emiluta'asigo huto hilibe luto kehelito fato'fomofihhi naga'i emito nohune. ⁶Lenali nani ka'ni keheli fe nelanamofihhi ya'ma babahi huse helenogo bona'a luga'a ka pelesa ilata nehanamagihhi osahi enahalune luto enegeba huto nohune.

⁷Nani hapa'ni lenogobisalo huto nohinamofihhi legeya'a bu galo. Lenalitogati bo moneubafi moneuba ai'amu kehelito Kilisitohi yagapana'a lolo hilinauba ai'amu ma luto kehelibe. Ai moneko'i Kilisitohi bona'a menohibe. Lali hiti ana huto asaga Kilisitohi yagapana'ago nohune. ⁸Sipi Bomofihhi foya'amu kehelito amuya'a limilata nohinamofihhi lenele'mo laba husemofihhi ni'igopa lenele'mo lukesa fi lepalalube luto ni'inaya nani ana amuya'amu luto nugufa lelito tito kaga lu lepilunamofihhi nubuya mehilina'mu yabe. ⁹To fayaha nasana yama koyoto nolepuna yamofi kumu lenelesa lusemofihhi ka'a koyoto nolepuna'mu ya'ma lenegekesa mekehelilo. ¹⁰Nani kumu ya'ma lite lilata nehabe: Fayaha nasana'mu kaga'a koli'a hiti to amuya'a hiti koyolata nohinaya logobisalo ya'ma amuya bo menohibe. To futu'a kaga lulata nohinamofihhi ya'ma nagami'a hiti lulata nohibe lite lilata nehabe. ¹¹Bona'i ya hi'ahana'amagi enali ma lite kehelilabe: Nani foto'i nohuto ka fayahi koyoto lepilata nohuta ananamofihhi legeya'a moneko legegeto folagahatinigu nohuto li huto huto melenogo'ni bu galube'mu hube.

¹²Bona'i enugufa lelite titi hite neminana bona'i enalitoga lali i hepito legege hilune luto enali suhi huto nohune luto nolupiye? O'e. Bona'i ya hi'ahana'a enali hapa'ani ka keheli melete sibigopa ka lilata nehabe. Enali enegekesa'anilo kehelite ai bu gago ai bu gago hite hapa'ani li gehe nelibe. ¹³To laliya Hu'mau melimi'ehina foya sokapo kumu lugufati li ho tiluta meni'ibe. Ai'a limi'ehina foya sokapo hiti lili'na hiti ya'ma'asigo liluta ni'ibe. To ana amuya'a hiti lili'na'a hiti limi'ehinana mone lenalitoga liluta luto lu limi'ehina yabe. ¹⁴Lali foya'amofihhi legegeto huto lulata nohune. Foyamofihhi kupa'alo yamofihhi lama'naka lenalitoga ni'inamo ni'inaya yabe. Hiya hutobe? Lali kohe toto ya'ma lenalitoga nehetito lali labagaguti Kilisitohi ka lamana'a yata'a hapi hite keheli'ahanamo ni'ibe. ¹⁵Lali bona'i luga'amagihhi enali foyagu laga'a keheli'ahana suhi huto moloto lali li'ohutamo ni'ibe luto

lugufa lelito tise kaga lulata mone mehune. Keheli ule'ale huse'natini yamofito yahi lilenogo lali lenalitoga buto foyamofihhi kupa'a Hu'mau molo leto'ehina'a ya'ma le'mo hofa talune luto ya'mu komopatigu lebesi'ehinamo ni'igo kehelito nominone. ¹⁶Ya hulototi lenemegeesaga ni'ina hepatoga bona'magihi enalitoga ka lamana'a lu huto huto lu epiloto bo mone'mofihhi foya kupa'agu lali'i li huto hu'ohutamofihhi lugufa lelito tilatanamofihhi kaga luse'a mone lu meemilune.

¹⁷Mono bukugu kaga mone ma luto ni'inamo ni'ibe: *Moneuba lelito titi huto kaga lilube'mu nohina boubu ai Sipi Boubu li huto hu'ehina'mu keheli emito Sipi Bomofihhi gi'a liyafa huse ka lilibe.* ¹⁸Moneuba ai'a gufa'a lelito tito nolinogomo ya'ma fa'menena lolo nohibe. Sipi Boubu ana bomofihhi gi'a le'mo ho tigo lamana'a lolo hu'ehibe luto lilune.

Polu to faga aposolo bona'magi

11 ¹Kaga nesi'a mone lu nolepinogo'ni negi ka lolo nohinogo kosele kasele'i meleneheno. Fa'mene ya'ma legeso hite kehelilo. ²Nani lenali kumu yabe luto Hu'mau siko hulata nohina'mu yabe luto amuya mololata nohube. Lenali bo alobo suhi meko'ehina pa'i bala bulu tigo mino'ehina ana legi hite nehite bo monekomofito bilabe luto nani keya'i molo lepolo'ohuna ya'ma Kilisito nohibe. ³Yamofihhi ya'ma osifa'uba mi'i mololata nohinamofihhi hapa'a keheli fe lite minete Ebahi ya'ma faga kagaloti mi'i molo eto'ehina, ana kagaloti lenalitoga bona'i luga'amagi enimi'i molo lepalalana'mu kehelilata nehana golo golo gilenogo babahi Kilisito kumuko kehelilata nehanamofihhi he'mi lalabe luto nekehelugo keta nohigo nolube. ⁴Lenalitoga bona'i moneuba henetito Yesuhi hapa'a lali lu lepilata nohutamo ya suhi huto ni'igopa meha'a fato fato'mofihhi mone lu lepi'ehinamofihhi to koyapa'i lalitogati li'ehinamo ni'igopa fato fato'mofihhi kosaba kaga lu lepi'ehinamo ya'ma to ka lamana'a lalitogati keheli'ahanamo ni'igopa mono ka fato fato'mofihhi lu nolepigo o'e lite melise fa'mene keheli emilata nehanamofihhi bati huto ni'ifihe? O'e, yana'mu komopa'nigu keta nohigo nolube.

⁵Nani'nimu kehelugo nanitoga ana'ina ya suhi ma suhi sa sa huloto aposolomagihhi bo sipi enonogo melete enigigusa'aluga nominona legita lolo mehibe. ⁶Nani nabagaguti kaga lu lepilata nohuna nesi'a amuya memolo'ohunamo ni'inaya to Hu'mamofihhi ka hapa'a keheli bati hu'ohuna yabe. To yamofihhi hapa'a fato fato suhi huto lu hokolo huto lenubulo li moloto lu lepilata nohune.

⁷To lenali lenele'mo hofa talube luto nani'ni imo limito minoto Hu'mamofihhi ka lamana'a lu lepi'ohunalo mina'a mone liluna'a mehu'ohuna yamofihhi sibina hu'ehifi bati hu'ehibe? ⁸Lenalitoga mono foya nolito lenehe'malube'mu nohube luto to Hu'mamofihhi naga'i luga'agati yogo fe'nohi lilata hu'ohuta ya'ma enali nasana'ani gumina

lise suhi huto lolo hu'ohuna ni'ifihe? ⁹To lenalitoga nohuto ana'ina mone kumu sa huto buto mone lu melepi'ohunamo ni'ibe. Nani'ni sa sa huto humofa'na nohugo Masetonia hepatogati nalalu'nigi nehetite ana'ina nimite li nabaga meelata hi'ahana. To lenalitoga ya'ma fa'mene nohuto keta'a hiti nasana mone ligo mefi lepolo'ohunamo ni'ibe. To mino lito tito aku'i ligo mefi lepalalube luto nolube. ¹⁰Kilisitohi ka lamana'a komopa'nigu ni'igo lama'naka nolube. Ana suhi hulata nohuna nugufa le'mo napa huto hu tegi huto noluna kapo henana'mu Akaiya kapotiniguti mone fi hekini melalana'mu yabe. ¹¹Ya'ma yamofihhi hena'mu nolube? Komopa'ni melepise ya hulata nohufihe, ya suhi huto meni'ibe. Komopa'ni lep'i'ohunamofihhi Hu'mau moneko bu go'ehibe.

¹²Lenalitogati mina'a melito aku'i kohe toto nasana lilata nohuta ya suhi huto minalube'mu hube. To yamofihhi fa'mene'mu ni'igopa bona'i luga'amagihhi Polu foya lilina yamofihhi babeyafalo minalune lite lilata nehana enugufa lelite ti lalabe luto yamofihhi lukesa'ani li sigilata nohune. ¹³Bona'i ya hana'amagihhi aposolo faga fagamofihhi to mono ka foyamofihhi faga faga'a lite minete, Kilisitohi aposolo'a lali'i babeyafa'a lolo hilata nehabe. ¹⁴Ya nehite yamofihhi nasana'a fato fato'mofihhi mone li'ahabe luto lilupihe? Ya luto meni'ibe. Satau ai hiti ya'ma agelo bona'a fi fana tete enali babeyafa'a lolo hulata nohibe. ¹⁵To Satahi foya'a lilata nehana bona'i enali ana hite lamana'amofihhi kele kele'i hi emilata hi'ahana babeyafalo enali'ani babahi hite lolo hite minete nehago topa mehalune. Enali minete sibi foya'a lilata nehana yamofihhi mone legeya'a lilune'mu habe.

Polu aposolo foya lito gabu'i gi'ehinamofihhi ka'a

¹⁶Kaga lu'ohunamo aku'i lilube. Nani kumu negi bo lolo nohibe lite kehelite mehilo. Sibi yamofihhi nani kumu ma lite nekehelitemo keheli nimilenogo nugufa nesi'a le'mo napa huka huto lilube. ¹⁷Nani kaga ma luto liluna ya'ma Sipi Bouba lu'ehina supo huto lilugopa fa'mene nugufa lelito tito ka'a hapi fi'ohube luto sibigopa negi kaga lilube'mu hube. ¹⁸Bona'i silaga'magita lugufamofihhi nasana'mu le'mo napa hite kaga lilata nehanagihe, nani ana huto fa'mene babeyafa huto lilube. ¹⁹Akae. Lenali ana'inamofihhi lenali ana'ina hapa'amu kehelilata nohuta bona'i nohune lite li'ahanamo ni'inaya luga'amagi negi nagi ka lenelepilago keta mehuse hite keheli'ahanamo nehabe. ²⁰To koko yagapanatini lenele'mo malalune'mu nehite, to nose'natini lenebesilite nalune'mu nehite, to fi taga hi lepelete nehite, to enigihiti bo lolo hi lepalalune'mu nehite, to lenogolaga lenabaga i gofa halune'mu nehinogo yana'mu lenali kele'na ka meepekise keheli epilata nehabe. ²¹Lali ya'ma ananamofihhi suhi amuya memolotogo lenali koli nehabe lite nelafihe? Lali lenalitoga agoya huto mino'ohune. Yana'mu lubuyati hilifihe ya?

Mone'amagi ana'ina ya suhi ma suhi hite haha luloto ya'ma li'ohune lite nehinogo nani hiti negi bona'magihi suhi huto nelesa melinogo lilunagihe. ²²Enali'ani'mu Yuta bo nohune lite lilata nelago, nani hiti ana huto Yuta bomo nohube. Enali'ani'mu Isilaeli bona'i Hu'mau lele'mo ho ti'ehina'a nohune lite lilata nelago, nani ana huto lulata nohube. Enali aku'i ana hite enali'ani'mu Abalahahi tata'agita nohune lite lilata nehago nani analo enemege'i moloto lulata nohube. ²³Enali'ani Kilisitohi keke keke bo'a nohune lite nelago nani ya'ma sibigopa negi nagi ka lilube. Nani enebe ligito Kilisitohi koko bo'a fato fato'mofihi nohube. Nani foyamofihi keke'i luse nohuna ya'ma fato fato suhi huto ni'ibe. To mono ka'mu luto naga nonugu tilata nohuna to segi osatu nehelago nagabu'i gilata hu'ehina. Babu yupahi nani filise'na hu'ohunamofihi fato fato legegeto tito ni'ibe. ²⁴Yuta bona'i enali kana nayahi mone kegi'a su hago osatu nehe'ahana 39 higo nehe'ahabe. ²⁵Kana loebe monebe Lomu bona'magi segihi osatu nehe'ahanamo ni'ibe. Kana moneko yupahi efa osatu nehelago filise'na hu'ohunamo ni'ibe. To kana loebe monebe higo boti ya'ma li gofa higo nagamilugu limise'na hu'ohunamo ni'ibe. To kana moneko yupahi nagamilugu hege nagami'i gupisalo minoba minoba nohugo ikahi tiloto limilago, yege tiloto limilago hu'ehina yabe. ²⁶To kana babu luto yatama kapo buba buba humofa'na huto nohugo ko'uba nagami'uba hago filise suhi huto mino'ohuna yanamofihi gupisalo tito mino'ohunamo ni'ibe. To lubalo gumina bona'magi kofohi nemalago buto kapo molo'ohunamo ni'ibe. Yuta bona'i nani hepato bona'magi to fegutoga bona'magi nohose'na hite nehago folagaha'anigu mino бага ito mino'ohunamo ni'ibe. Sipi hepatoga buto bona'magi li gehesa hite nahalune'mu nehago mino бага ito mino'ohunamo ni'ibe. To fa'mene ka me'i ni'ina metoga hiti foya yupa kopa humofa'na huto filise'na huto mino'ohunamo ni'ibe. Hege nagamilugu ya'ma folose supofihi legegeto to mono ka faga hiti lilata nehana bona'nimagihi folagaha'anigu mino бага ito bula ola nohunamo ni'ibe. ²⁷Hitupa foya lito nugufa nagabu'i gigo humofa'na huto nubui ko bati mehuse humofa'na huto kau'namu filito yafi nagami kumu nebesigo yasi'mu filito mino'ohunamo ni'ibe. Gukete'mu to nebelusa'mu sa sa huto mino'ohunamo ni'ibe. ²⁸To yanamofiko mone meni'ibe. Kana'amu kana'amu komopa'nigu nagabu gigo nogo noto hepatoga buto Sipi Bomofihi bona'magihi asaga'i kaba hu epololata foya'mu kehelugo keta nebesigo minolata nohube. ²⁹Luga'amagi Hu'mamofihi kagu amuya memalago nani keke'i lu epoloto nohube. To luga'amagi enali Hu'mamofihi kagu ho kete limi'ahanamagihi komopa'anigu keta nohigo kehelito nominobe.

³⁰To nani nasana mono kumu nugufa le'mo hofa talube luto noluto'nimo amuya memolo'ohuna yana'mugopa le'mo napa huto linogo'ni bati hilube'mu hibe. ³¹Sipi Bo Yesuhi afo'afu Hu'ma ai'a ya'ma

nani kumu bati huto nokehelibe lama'naka luto'nimofihi keheli'ehibe. Ai gi'a li saga huto fokehi luba luba hulata hiluna'mu yabe. ³²Nani Tamasiko hepatoga nohugo gihiti bo Aletasi gamaniuba naga nonugu nele'mo malalube'mu nohuto lito nohi hepato gegisa'amofihi kasinugu kofohi mele'ahana. ³³Ya nehago nigibo nalalu'nigi enali sipi sepekele'nagu li gu ilete bihu gegisa hokolo hu'ehinaguti fitu fe he'migo leke ho limito fegutoga folo'ohuna yabe.

Polu komopa'amofihi bamu'i ego'ehina ka'a

12 ¹Nugufa le'mo hofa taluta ka'a kosaba'i yamofi mone le'mo bati mehilynaya fa'mene yamofihi lilube. Komopa'ni li gelehe higo ana'ina bamu'i bu go'ohuta to Sipi Bouba lu belegepa ito lu'ehina yamofihi yata'isi beto huto lenelepilugi kehelilo. ²Nani Kilisitohi bona'a mone'i keheli'ohube. Nani ya'ma nasana mone bu go'ohuna kana'a kufu 14 nobigo bo mone ai'a ya'ma Sipi Bouba fa'mene le'moto tito kokuluma ifo muya gupisalo ni'inagu ya'ma ti'ehina. Nani gufa'a hiti ni'ifi to gufa'a gololo tilago ni'ifi luto ya'ma keheli bati mehube. Hu'mau ai'a ya'ma keheli'ehibe. ³⁻⁴To ana bo ai Sipi Bouba fa'mene le'moto tito ya'ma Palatisi gi nohota foyagu tito ka'a lu bagaguti meluse to metoga bona'magita lu huto mehilabe luto ya'ma keheli'ehina. Nani ana bo ya'ma keheli'ohube. To gufa'a hiti ni'igo ti'ehifi to gololo tiloto kokulumagu ti'ehifi yamofihi nani mekeheli'ohube. Hu'mau aigo keheli'ehibe. ⁵Ana bomofi kumu luto gi'a le'mo hofa toto lilube luto ya'ma nani'ni hapa'ni le'mo hetofa huto melilube'mu hube. Nani'nimu lilube luto yamofihi lapa mebi'ohuna yamofi kumu ya'ma lu hetofa huto liluna'mu yabe. ⁶Nugufa le'mo hofa taluna ka'a lilube luto lutita lama'naka luto lutitamo ni'inaya negi nagi bo meminotita'mu yabe. Ya hu'ehinaya, nani kumu kehelinogo ti lalibe luto yamofihi mone melilube'mu lube. Ana'ina'mu lugo to lolo huto moloto nohugo lenalitini bu gete akehelilata nehana ana legegeto huto minalina'mu yabe.

⁷Sipi Bomofitogati ana'ina kosaba'i bu goto moloto hu'ohunamofitoga komopa'ni ti lalibe luto nugufa meme'agu ema ufeha'a hiti nasana monetu fi'ehinamofihi Satahi keke keke pana'a moneuba ai komopa'ni kehelinogo ti lalibe luto nayaha'ni nalapihe luto lu'ehinamo ni'ibe. ⁸Ya hinogo he'mi neto lalibe luto Sipi Bomofitoga kana loebe monebe yupahi loka ho'ohunamo ni'ibe. ⁹Buka tugo ka'a ma luto lu nimi'ehina: Nani felisa'niuba kai amuya memalalata'mu yamofihi babu luto kimito kele'mo bati hulata nohibe. Nani kehe'mose nani'niuba kaitoga i bilito buto ni'inogo ana'ina mone kumu buka tilata'a meni'ibe luto lu nimi'ehina. Ya hu'ehina'mu Kilisitohi amuya'aua nani'i nele'mo amuya malalibe luto lapa mebi'ohuna yana'muko le'mo hofa toto noluto'ni negelo'ni bilata nohunagihe. ¹⁰To Kilisito kumu yabe luto amuya memalaluna ni'ifihe?

To nele'mobe hokobe hi netalana ni'ifihe? Keke'i luse'namofihi gupisalo minaluna ni'ifihe? To bauna fise'na to kalana'i melese'namofihi gupisalo minalunamo ni'ifihe? O'yo. Fa'mene yana'mu komopa'nigu keheli sibina mehu'ohube. Nani lapa mebi'ohunalo ya'ma ai'a amuya'a nimilago amuya mololata nohunagihe.

Polu Koliti bona'i keke'i lu epolo'ehina

¹¹Ya'ma nani kumu lulata nohuna ka negi nagi ka lu'ohunamofihi lenali kehelite melete hi'ahana yanauba nele'mo topa nohago nolube. Lenalitini nele'mo hofa tenogo bati hilinagi. Nani fayahi afo'afita fa'mene bo nohunaya enali enegekesa sipi bo nohune lite keheli'ahana lenalitoga bite nehana'amagi nebe meligi'ahana yabe. ¹²Nani lenalitoga foya bati huto lugo topa hose suhi to ana'ina kosaba'i bu go bati huse nasana kosele'i meho'ehina'a hiti huto hulata nohina yanauba aposolo bomofihi hapa'ni li huto hulata hu'ehina. ¹³To lenali henana'mufi sa sa hilete Hu'mamofihi naga'amagihi li gehesa luga'a lenali babeyafalo meni'ibe. Nani lenalitoga moneko nasana huto mehu'ohunana ni'ibe. Nose'natini to ana'inatini lenebesilito kalana'i memolo lepolo'ohunamo ni'ibe. Ya huloto lenele'mo sibina luse'na yamofihi lenali keheli sibina hite hi'ehilanamo yana'mu foipana'ni he'milo luto lenoloka halufihe, ya?

¹⁴Nani lenalitoga loe yupahi bu'ohunamo ni'ibe. To yatai ya'ma aku'i bilube luto le'mo bati nohube. Binogo'ni kohe toto buto nugufamofihi nose'na'a hiti fe'noha'a hiti efaha'a hiti mone lenoloka mehaluna'mu yabe. Lenali yogo fe'nohatini'mu ni'igopa lenali kumu yabe luto amuya mololata nohube. Yagapana'i kitili'amagi ito'anigi afo'anigi enele'mo nupa hilana'a mehabe. Enali ito'anigi afo'anigi lelite tite nose'na enabagagu bilana'amuko keheli bati hite minelata nehabe. Nani afotini'fihi suhi huto nohuto ya'ma lu nolepube. ¹⁵Ya suhi huto nani lenali kumu yabe luto yogo fe'noha'ni minoto lito hulata nasana'ni li he'milube luto keta mehuse huto nohube. To nani ya huto komopa'ni lenelepilata nohunogo lenali komopatinitu nani kumu lenemehi melelata nehanamofihi inomo limito minalifihe?

¹⁶Bona'i luga'amagi nani kumu ya'ma lite lilata nehabe: Ai'a nasana'a li be sililata'a mone menilinaya ai suguna'i huto bona'magihi fi taga hu letoloto limi'i mololoto ana'inatini be sili'ehilina ni'ifihe lilata nehabe. ¹⁷To nani hiya huto ya hu'ohuna ni'ibe? Lu nimilo. Nani yagapana naga'ni lenalitoga enoho lufugo bite ana'ina mone bite li'ahafihe? O'e. ¹⁸Taitasi ya'ma bilifihe luto lu eto'ohuna to lalalutifu mone ho lufugo moneka bi'aha'igo yamofihi Taitasiu buto lenalitogati ana'ina mone lenebesili'ehifihe? O'e, le'ali komopati'a li hepiloto kapo monekolugu ito moneka nobu'ibe.

¹⁹Kaga oto lulata nohuna yamofihi lenali keheligo ka'ni ya'ma lenele'mo hetofa huse kaga noluna lolo nohifihe? Ya suhi meni'ibe.

Nani Kilisito hiti nohuto'ni Hu'mamofihhi bulo kaga lulata nohube. To nigibo nalalu'nigita, lamana'a nani kumu yabe luto melube. Mono kagu lenele'mo hetofa hilube luto lulata nohube. ²⁰Nani lenalitoga buto bu lenagaluna lenali kumu kehelinogo bati mehilihihe luto, to lenali nani kumu ana hite kehelinogo bati mehilihihe luto nokehelugo keta nonebesibe. To lenalitoga kenasabo bise'na to siko huse'na, to ibe fitobe nasana, to molomo titi hilata'na, to libe pigi bibe nasana, huli tali ka mege ka lulata, bona'i enugufa lelite tite, li sibi sibi hilata nasana yamofihhi ni'inogo buto nehetito bu go lalube luto nokehelugo keta nonebesibe. ²¹Lenalitogati luga'amagi ema afeha'aga komopatini kolo tago, moko lise'na to mokolo'namu enegekesa yigi yigi hi'ahana'a ya suhi ma suhi huto komopatini li gelehe mehise ya suhi hite nehinogo lenalitoga buto nehetiluna yamofihhi lenogobisalo Hu'ma'niuba nele'mo laba hilenogo lenali foipanatinimu nipa'nigu ekesa ho lalibe luto nokehelito keta nonebesigo ya hulata nohube.

Lipoti molo epoloto koyo epi'ehina

13 ¹Ya'ma lenalitoga aku'i binogo kana'a loebe monebe hilina'mu yabe. Mono bukugu kaga ma luto ni'ina: *Ka foya lilana kanagu bo moneuba foipana hulenogo bo loebefi loebe monebefi bu gelete lu huto hilenogo lama'naka litemo ni'ibe*. Lenalitoga bu nehetilenogo ana kaga'a keheliloto ka'a lilube'mu hube. ²Afeha'aga ema foipanatinu hiti mine'ahana'a to luga'a lenali hiti lalitoga alihi kana buna yupahi lipoti lepito lu'ohunamo ananamofihhi nugufa'a foto'i nohuto aku'i ya'ma nolube. Alihi aku'i buto lenubuto mebiluna'mu yabe. ³Kilisitou ya'ma kaga lu nimigo lulata nohunamofihhi hapa'amu lenali sa sa nehana ya'ma bu go fe lilabe luto Kilisitou ai'a lenalitoga foya lilata nohina yamofihhi agoya'a hiti meni'igo folagahatinigu amuya'a hiti lilata nohibe. ⁴Koyapa'i lama'naka luto ai legeso huto nohigo malipu yafalo he'ahanamo ni'ibe. Yatai ya'ma afo'afihhi Hu'mamofihhi amuya'a lito ho tito minomo buto nohibe. Lali ana huto ai hu'ehina suhi huto legeso huto nohutaya aitoga i hepiloto Hu'mamofihhi amuyalo buto lifita ito minolata nohuta yamofihhi hapa'a lenalitoga li huto hu lepiluna'mu yabe.

⁵Lenali ya'ma lama'na ka mono kagu nehafi menehafi komopatinimofihhi fi taga hi etete bu geletetini yamofihhi hapa'a lu huto hilo. To Yesu Kilisito hi ya'ma komopatinigu le'mo malago nominanamofihhi hapa'a akeheli'ahafi ya? To komopatinigu menominogomo lenali ka'a keheli fetaga hi'ahafi, kehelilo. ⁶To nani ya'ma ka'a keheli fetaga hu'ohuna'a meni'ibe. Ya suhi hite bu nagalabe luto fifa ilata nohube. ⁷Hu'mau keheli'ehinogo foipanatinu li huto mehilabe luto nani Hu'mamofitoga loka hoto nominobe. Lenali bu negenogo mono bo lamana'a lolo huto minalube luto meni'ibe. Lenali

Hu'mamofihi ka keheliya ilana yanauba huto hu lamana hilibe luto lulata nohube. To nani fa'mene bo mono kalugu minaluta'a ya bati hibe. To nugufaua mono bo nohuna lolo hilinamofihi fa'menena ni'ibe. ⁸Lali ya'ma'amagita hena hena huto ka lamana'amofihi luba li emilune? Fa'mene fi hetofa hu etalune luto amuya moloto legeya'a huto hilina'mu nominone. ⁹Lali bona'magihi enubulo amuyati'mu sa sa nohutogo lenali mono kagu amuyatini hiti minalana ya'ma lipagu lagati lebesilina'mu yabe bati hilune'mu hune. Ya nehinogo komopatinigu fi fana talibe luto Hu'mamofitoga kaga luto nohune. ¹⁰Nani lenalitoga buto keke'i luse'na lepi lalube luto fato'i nohuto lipoti kaga lu huto huto fayahi ya'ma koyoto nolepu. Sipi Bouba amuya nimi'ehina nasanaloti lenali'i lenefelu haluna'a meni'ibe. Lenali lenufusatini le'mo amuya malalibe luto lu nimi'ehinamo ni'ibe.

¹¹To nalalu'nimagita, kaga lu su hoto ma luto lilube. Lenali lenipagu keheli bati hite minalo. To lipoti lu lepito kaga ya'ma noluna kehelite komopatinini le'mo hetofa hite le'mo lamana hilanagihe. Ya nehite lenalitini komopatinini le'mo moneko hilete fulunagu minalo. Ya hilenogo Hu'mamofihi mehi lepise'na to fulunamofihi afo'afu lenalitoga minalina'mu yabe. ¹²Lenali ai be tinogo ai be tinogo hite minete, ai soso hu etenogo ai soso hu etenogo hite koguna ite minalo. To Hu'mamofihi bona'i malo nehana asaga'magi keketini li lepelelata nehabe.

¹³⁻¹⁴Sipi Bo Yesu Kilisito lehe'mose'na yauba to Hu'mau mehi limilata nohina yanauba Hu'mamofihi Sikalafu'uba lenele'mo hepilata nohina'a yanauba lenalitoga mino lito buto mineno.